

O COLECTIVO GAI DE COMPOSTELA

Folleto Mensual
de Información

Nº4, Xullo-1996

Editado polo
Colectivo Gai de Compostela

Éxito de convocatória nos actos do Dia da Libertación e do Orgullo gai

O Colectivo Gai de Compostela está satisfeito co éxito de convocatória dos actos reivindicativos celebrados co gallo do 28 de Xuño. Na concentración do Toural acadou-se a mesma cifra de asistentes que a do ano pasado, máis de 150 persoas. Así e todo, botou-se en falta a asistencia doutros colectivos de acción social, como os feministas, que non foron convocados hogano. Pero se a concentración supuxo unha consolidación, a festa bateu récords de recadación. O número de actuacións e de asistentes superou con moito o doutros anos. A mesa informativa que instalou o CGC na Praza do Toural o próprio dia 28 achegaron-se numerosas persoas. Algunhas existencias de material exposto (revistas, pins, auto-colantes...) case chegaron a se esgotar. Por outra banda, a asistencia ao ciclo de cine celebrado en

Vite durante toda a semana foi similar á do ano pasado.

O CGC entrevista-se cos grupos parlamentares

Crendo na necesidade de dialogar con todo o espectro político do noso país, especialmente coas formacións más representativas, o CGC entrou en contacto durante o mes de xuño cos grupos parlamentares do PP e do BNG para tratar as cuestións que nos preocupan: parellas de feito, agresións e política de subvencións. A posición do representante do grupo popular, Daniel Barata, ante as propostas do CGC foi receptiva e positiva. Ainda así, admitiu que a consecución da igualdade de direitos para os gais había ser un pro-

ceso lento. A entrevista co grupo parlamentar do BNG foi moito más positiva. O CGC entrevistou-se con Bieito Lobeira e con Olalla Fernández que, como representantes do grupo da oposición, mostraban-se dispostos a levar ao debate parlamentar as nosas propostas. Os representantes do BNG foron moito más concretos á hora de informar á delegación do CGC a respecto de liñas de actuación e de expectativas de consecución do que lles propuñamos. Ainda que estaban totalmente de acordo coa lexitimidade das propostas do CGC, que se comprometeron a estudar

e apresentar perante a cámara, mostraban-se escépticos sobre a consecución das más das nosas demandas. Insistian no feito de que o PP era o grupo que posuía a maioria absoluta e que, por sistema, adoitaba rexeitar case todas as iniciativas da oposición. A reunión cos representantes do grupo parlamentar socialista terá lugar nas próximas semanas. O CGC cualifica as duas primeiras reunións como positivas e clarificadoras das distintas posicións. O colectivo reanudará os contactos



en setembro para concretar máis a posibilidade de conseguir introducir no debate parlamentar o tema das parellas de feito e o das agresións homofóbicas que sufren a cotío os homosexuais galegos. A reunión co grupo socialista terá lugar este mesmo mes de Xullo.

O CGC reúne-se co Valedor do Povo

Segundo a serie de contactos do CGC coas institucións do país, unha delegación do colectivo foi recibida polo Valedor do Povo. Durante toda a reunión, o Valedor desentendía-se competencialmente das peticións do CGC. Afirmaba non poder recomendar ao Parlamento da Galiza a consideración positiva dos direitos dos gais na legislación; segundo o Valedor, el non podía intervir na dinámica parlamentaria e ignoraba recomendacións similares feitas por

valedores doutros países e administracións gubernamentais. Así e todo, comprometeu-se a actuar no caso de que goberno galego se negase a prestar axuda económica ao labor social do colectivo ou a respeito da negativa do reitor da Universidade e mais do alcalde de Compostela a nos receber para tratarmos o tema das agresións.

Continua o siléncio por parte de Estévez e de Villanueva

Ainda non chegaron as respostas por parte do reitorado e da alcaldía para fixar unha reunión con membros do CGC para abordar as agresións a homosexuais que se producen na alameda e no campus composteláns. O CGC decidiu enviar outras duas comunicacións, esta vez más contundentes, para esixir unha reunión cos, que consideramos, máximos responsábeis da seguridade cidadá e universitaria. A posición do Valedor do Povo, que en principio se comprometeu a actuar de continuar esta actitude negligente, era tamén a de insistir unha vez máis antes de iniciar medidas de presión más serias. As cartas serán enviadas este mesmo mes e, de non recebermos resposta durante o mes de setembro, porán-se definitivamente en marcha as actuacións de presión programadas (cartas dos colectivos gais do Estado Español e da Unión Europea, cartas dos sócios, mensaxes en Internet, recurso perante o Valedor do Povo...)

Dossier sobre agresións

Co fin de concienciar os diferentes grupos parlamentares sobre a necesidade de investigar e actuar de vez sobre as continuas agresións a homosexuais en todos os ámbitos, o CGC está a elaborar un dossier sobre estes casos de violencia física e/ou verbal. Para iso precisamos da tua axuda: se sufriche unha ou repetidas veces agresións homófobas ou sabes de casos, por favor, conta-no por carta ou achega-te até Compostela para gravarmos o teu testemuño. Non só interesan os casos que se dan en parques ou baños públicos, é crucial tamén termos noticia de agresións na rua, no traballo, na escola ou na propia familia. Non se precisa saber o nome d@ agredid@, pero si outros dados como a idade, a data e o lugar aproximados da agresión, así como todas as características posíbeis d@s agresor@s. De ter-se efectuado unha denuncia, é importante especificar o tratamento do caso por parte da policia. Lembra, o teu testemuño, o de tod@s, é de máxima importancia para que a

sociedade se enfrente a sua realidade violenta e homófoba

Dossier sobre o labor social do CGC

Coa intención de solicitar axuda económica e a colaboración da Consellería de Familia, Muller e Xuventude, o CGC vai-se rexistar no censo que leva esta consellería de organizacións que prestan axuda e apoio social. Ademais, através dos grupos da oposición, o CGC pensa presentar na comisión parlamentar correspondente un dossier sobre o seu labor de axuda a moitos homosexuais que se atopan marxinados e discriminados. O colectivo está a facer un repaso dos casos atentidos e das campañas de concienciación realizadas nos últimos anos. Este balance imo-lo facer todos, por iso é importante que nos contes as circunstancias que te levaron a recorrer ao CGC e o tipo de apoio que atopache no colectivo. Xa sabes, contamos contigo, escrebe-nos ou achega-te a Compostela. Entre todos podemos reclamar os servizos que se nos deben e que se lles prestan a outros colectivos con más meios.

Tras o verán, novas actividades

A partir de setembro comezan-se a constituir as novas equipas de traballo nas distintas comisións. Por suposto, seguirán funcionando as tradicionais: revisita, relacións exteriores, festas e tertúlias. Non dubides en colaborar nas comisións que che interesen, e non precisas estar en Compostela para facé-lo. Podes traballar na tua propia casa escribendo artigos, elaborando informes, facendo cartaces, propondo temas e datas para as festas e as tertúlias, ocupando-te das relacións do CGC cos colectivos e institucións da tua cidade ou comarca... E, por suposto, tamén podes propor novas actividades ou a formación de novas comisións de traballo. Ainda queda moito por facer! Para os próximos meses xa se está a pensar na posibilidade de facer talleres de sexo seguro e de desinhibición sexual. Pero, enfin, ainda non son máis que proxectos... Colabora!

E en Agosto... Vacacións !!!

Ainda que a loita polos nosos direitos non se pode deixar nunca de lado, todos debemos repousar de tanto en vez. Así, no CGC estamos de vacacións en Agosto. Os que traballamos desde Compostela desexamos-vos un quente e pracenteiro verán.

Na sabes...

Escrebe-nos ao Apdo. 191 - CP 15780-Compostela ou vén ver-nos na Rua Entremuros 16 de luns a venres a partir das 20:30h